
Uppsetning á búnaði til eyðingar á áhættuvefjum úr sláturdýrum við sláturhús KVH ehf. á Hvammstanga

Ákvörðun um matsskyldu

Inngangur

Þann 26. janúar 2016 barst Skipulagsstofnun tilkynning frá Kaupfélagi Skagfirðinga um fyrirhugaða uppsetningu á búnaði til eyðingar á áhættuvefjum úr sláturdýrum við sláturhús KVH ehf. á Hvammstanga, Húnaþingi vestra samkvæmt 6. gr. laga um mat á umhverfisáhrifum og lið 11.14 í 1. viðauka laganna.

Skipulagsstofnun leitaði umsagna Húnaþings vestra, Heilbrigðiseftirlits Norðurlands vestra, Matvælastofnunar og Umhverfisstofnunar.

Gögn lögð fram

Tilkynning til Skipulagsstofnunar: Uppsetning á búnaði til eyðingar á áhættuvefjum úr sláturdýrum.

Umsagnir bárust frá:

- Húnaþingi vestra með bréfi dags. 11. mars 2016.
- Heilbrigðiseftirlits Norðurlands vestra með tölvubréfi dags. 19. febrúar 2016.
- Matvælastofnunar með bréfi dags. 11. mars 2016.
- Umhverfisstofnun með bréfi dags. 23. febrúar 2015.

Frekari upplýsingar bárust frá framkvæmdaraðila með bréfi dags. 6. apríl 2016.

Fyrirhuguð framkvæmd

Í greinargerð kemur fram að fyrirhuguð sé að setja upp og starfrækja búnað til eyðingar á áhættuvefjum úr sláturdýrum. Um er að ræða ofn sem verði komið fyrir í gám á lóð Kjötafurðastöðvarinnar á Hvammstanga og krefst uppsetning hans ekki sérstakra framkvæmda. Lóðin er á skipulögðu iðnaðarsvæði og fjöldi iðnfyrirtækja staðsett í nágrenninu.

Fram kemur að búnaðurinn brenni áhættuvefjum við háan hita í samræmi við kröfur sem gerðar séu í Evrópu. Búnaðinn sé auðvelt að setja upp á lóð fyrirtækja, við sveitabæi eða annars staðar þar sem úrgangur falli til. Þannig sé hægt að brenna úrgang sem til falli á staðnum, lágmarka flutninga og þörf fyrir stórar brennslustöðvar eða urðunarstaði. Búnaðurinn gangi fyrir olíu og verði áætlun um frágang á olútank fyrir búnaðinn unnin í samráði við Olís og í samræmi við kröfur þar að lútandi.

Ætlunin sé að eyða áhættuvefjum frá nautgripa- og sauðfjárslátrun sem falli til hjá Kjötafurðastöð KS. Áætlað magn í brennslu á sólarhring muni þó aldrei verða meira en sem nemi 10 tonnum þegar mest lætur. Í stöðinni verði einungis brenndur sláturúrgangur sem til falli hjá fyrirtækinu en ekki verði tekið á móti úrgangi frá öðrum.

Í frekari gögnum sem bárust frá framkvæmdaraðila þann 6. apríl, 2016 kemur fram að einungis sé ætlun að brenna áhættuvefjum úr flokkum cat 1 og 2 sem verði samanlagt undir 200 tonnum á ári.



Umhverfisáhrif

Mengun. Fram kemur að við brennslu á úrgangi berist útblástur frá ofninum, sem uppfylli viðmið sem sett séu í tilskipunum Evrópusambandsins. Ekkert frárennsli er frá búnaðinum og enginn úrgangur fellur til.

Í umsögn Umhverfisstofnunar er tekið fram að umsögn stofnunarinnar nái eingöngu til uppsetningar og reksturs búnaðar til brennslu áhættuvefja úr sláturdýrum. Umsögn Umhverfisstofnunar sem er í viðauka III í greinargerð framkvæmdaraðila fjallar einungis um rekstur brennsluofns við sláturhús til að brenna áhættuvefi úr dýrum. Eins og fram komi í greinargerð er losun brennsluofns innan viðmiðunarmarka í tilskipun Evrópuþingsins, 2000/76/EB.

Í umsögnum Húnaþings Vestra, Heilbrigðiseftirlits Norðurlands vestra, Matvælastofnunar og Umhverfisstofnunar kemur fram það álit að fyrirhuguð framkvæmd sé ekki líkleg til að hafa í för með sér umtalsverð umhverfisáhrif eða ekki matsskyld.

Skipulag og leyfisveitingar

Skipulagsstofnun vekur athygli á að framkvæmdin er háð leyfi Húnaþings Vestra. Einnig starfsleyfi Heilbrigðiseftirlits Norðurlands vestra skv. reglugerð nr. 785/1999 um starfsleyfi fyrir atvinnurekstur sem getur haft í för með sér mengun.

Niðurstaða Skipulagsstofnunar

Um er að ræða uppsetningu á búnaði til eyðingar á áhættuvefjum úr sláturdýrum við sláturhús KVH ehf. á Hvammstanga. Framkvæmdin er tilkynningarskyld til ákvörðunar um matsskyldu samkvæmt 6. gr. og lið 11.14 í 1. viðauka í lögum um mat á umhverfisáhrifum.

Skipulagsstofnun telur að mengun frá útblæstri og ónæði af völdum fyrirhugaðs brennsluofns verði lítið. Veldur þar mestu að umfangið er mjög lítið eða um 200 tonn á ári og er eingöngu bundið við þann úrgang sem fellur til hjá sláturhúsi KVH.

Skipulagsstofnun vekur athygli á því að ef framkvæmdaraðili hyggst brenna meira magn og/eða annan úrgang en fellur undir áhættuvefi í flokkum cat 1 og 2 ber að tilkynna að nýju til Skipulagsstofnunar um breytingar á starfseminni. Slík breyting á starfseminni fellur undir tölulið 13.02 í 1. viðaukavið lög um mat á umhverfisáhrifum.

Í samræmi við 6. gr. laga um mat á umhverfisáhrifum hefur Skipulagsstofnun farið yfir þau gögn sem lögð voru fram af hálfu framkvæmdaraðila við tilkynningu og umsagnir. Á grundvelli þessara gagna er það niðurstaða Skipulagsstofnunar að fyrirhuguð uppsetning á búnaði til eyðingar á áhættuvefjum úr sláturdýrum við sláturhús KVH ehf. á Hvammstanga sé ekki líkleg til að hafa í för með sér umtalsverð umhverfisáhrif með tilliti til eðlis framkvæmdarinnar, staðsetningar hennar og eiginleika hugsanlegra áhrifa hennar, sbr. þau viðmið sem tilgreind eru í 2. viðauka laga um mat á umhverfisáhrifum. Því skal framkvæmdin ekki háð mati á umhverfisáhrifum.

Skipulagsstofnun ítrekar mikilvægi þess að Kaupfélag Skagfirðinga og aðrir sem að framkvæmdinni koma viðhafi þá verktilhögun og mótvægisáðgerðir sem kynnt hafa verið við meðferð málsins og vöktun á aðgerðum og áhrifum þannig að framkvæmdin sé ekki líkleg til að valda verulegum og óafturkræfum áhrifum á umhverfið.